

痘疹活动心法

R272.2
10-3

清江聶尚恒久可著

痘疹活心

法全書

久吾先生痘說敘

世之不得已而用者二曰兵之於敵藥之於病是
也是二者其道皆以攻伐爲事以克爲功以速爲
巧而世醫不諳病機損之則疑實而益之則疑虛
燠之則疑陽而冷之則疑陰於是曲爲調停之論
以圖持久之計而嘗處於不見功不見害之間久
之而功愈遠害愈近此猶庸將握兵智勇俱困齷
齷自保而徒甘詞重幣乞盟於敵冀其自退敵脆
可也敵堅則蔑不覆矣蓋凡病盡然而至於兒證
之有痘則受毒自始生其伏不可窺其發不可留

生死在呼吸變幻不容瞬而亦御以調停持久之法此其謬尤甚譬之古者齊晉秦楚之治兵相遇中原或摩壘而進或交綏而退可戰可和猶未害也若乃後世之兵輜鉅鹿鏖昆陽寸守官渡決勝淮淝尙可以兵交使在者等論耶善乎久吾先生之論痘也曰毒可逐而不可解也治可急而不可緩也於是創爲一書盡破近世似是而非之論庶幾提抱中物不至枉殺蓋其見卓矣卽倉扁復生不能易也孫子不云乎解雜亂紛糾者不控捲救鬪者不搏搢批亢擣虛形格勢禁則自爲解耳然

則先生之所謂可逐而不可解者是固所以深解之也耶是兵說也

萬曆辛亥孟冬月上戊日

賜進士福建等處提刑按察司按察使同年友弟

高安陳邦瞻書

痘疹活幼心法小引

醫之道肇自神農而源於黃帝其來尚矣而黃帝
曰幼小者吾不能知也以是知治幼之難雖聖人
之神明有不徧也夫人之生也無論賢愚貴賤孰
不由幼小而長成當其幼之時不能保其無疾則
治之不可無法也至於痘疹自襁褓而上人人皆
不能免則治之法尤不可不精也然而面自今以歷
邇之於古治幼之法甚疎而治痘之法尤疎雖自
古明哲之士著論立方猶未得其竅妙而況其下
焉者乎世之庸醫任其陋識以用藥世人不知而

過聽之其天害生靈也不可勝計世之腐儒率其
淺見以著書世人不察而悞用之其天害生靈也
又不可勝計夫使兒童夭折弗遂長年豈非舉世
之大患而仁者之深憂乎先大人專心理學而旁
通於醫予少時嘗聞其訓曰事親者不可不知醫
慈幼者不可不知醫於是每乘暇日博覽方書精
察病情而於治幼治痘尤精心焉蓋因其術之獨
難也是以用心獨苦也閱歷之多精思之久天啟
其衷豁然深悟其妙理每用之家族用之姻友隨
試輒効有可自信者不惟庸醫腐儒之淺陋得以

洞察其弊而救正之凡前哲之方論皆得參酌裁
決無有能出吾範圍者於是寫吾心之所獨悟而
發前人之所未發取其長棄其短矯其偏救其失
其辨症也簡而明其立方也精而切著爲一編命
之曰活幼心法謂以吾之心悟爲後法而可以廻
生起死也又附問辨醫案子其後以憲吾言之非
無徵吾法之果可用也嗟乎一善成名君子所恥
而況於技乎予豈以此自表見乎然而始之苦心
於此聊以自爲不虞其技之精妙一至於此而可
以救生靈之夭折也是以不忍自私而必以公之

痘疹活幼心法目錄

論受病之源

折諸家之衷

闢時醫之謬

辨虛實寒熱之異

晰氣血盈虛消長之理

精炮製用藥之法

初發熱至痘出齊數日內調治法

痘出齊後起發灌膿數日內調治法

漿足回水至結痂還元數日內調治法

備用緊要諸症方論

附或問六條

附治痘醫案十一條

附麻疹

附古今治痘要方

附痘疹禁忌

附幼兒雜症方論

痘疹活幼心法

○論受病之源

痘疹之源有謂兒在胎時食母血穢而致者有謂父母慾火所致者慾火之說出於臆測固無明據嘗見孕婦飲食清淡者生子出痘多稀少而平順恣食厚味者生子出痘多稠密而險危則其病源受毒于母胎血穢似有明驗蓋飲食淡則血氣清而胎毒輕飲食厚則血氣濁而胎毒重受毒輕故出痘少受毒重故出痘多其理易明也近有好爲奇論者謂凡人豈無慾火胎毒而獨不出痘則此

二說皆非也諸痛癢瘡瘍皆屬心火以中國地對
外地分四方則中國屬東南外地屬西北東南屬
火故心火旺而有痘瘡西北屬水故心火不旺而
無痘瘡又以外人居中國則亦出痘中國人居外
地亦不出痘爲證此論似是而實非也若痘非胎
毒果因地方火旺而有之則閩廣等極東南之地
其人出痘當至再三何以一生止一次與中土同
也意者北地極寒其人無屋居鮮火食冒風霜犯
冰雪腠理秘密若禽獸然卽有胎毒當爲別症不
能宣發于皮膚而爲痘瘡是以 人不出痘也不

可執此而謂痘非胎毒也夫胎毒潛伏于五臟有觸則發無觸則不發故其發有遲速當其未發時形氣俱民無可端倪若未熾之火何處尋覓又何可解釋故予以爲古立預解痘毒諸方若無故而逐寇于通都不近理也及其有觸而發則勃然不可禦蓋其毒氣發自五臟實動五臟真氣全賴血氣送毒氣而出之於外運化之而成漿收結之而成痂而後臟腑可安若血氣送毒氣不出則毒氣反攻臟腑如寇作于都城中主者不能操謀奮武逐之出外致令操戈內攻安得不危故用藥猶如

用兵不可不透此理也

○折諸家之衷

治痘之家多矣劉河間悉用寒涼偏害非小至於錢仲陽立方亦以解毒爲主而多用寒涼少用溫補張潔古玉海藏咸宗之此其意俱本於內經諸瘡瘍屬心火之一言故以寒涼瀉火也厥後陳文中立方力矯其偏專主溫補凡痘瘡未出已出之間諸症悉用十一味木香散已出之間諸症悉用十二味異功散其意歸重于太陰一經蓋以手太陰肺主皮毛足太陰脾主肌肉肺金惡寒脾土惡

濕故用丁香官桂以治肺之寒用朮附半夏以治脾之濕二方用之得其當其效固大然不分寒熱虛實而一槩用之則宜於虛寒不宜於實熱其偏害又可知也朱丹溪辨之是矣至丹溪五論矯陳氏之偏而取錢氏之長主於解毒和中安表似爲的當舉世宗之數百年來無敢議其失者予則以爲丹溪治他病多妙論獨於治痘則孟浪而未盡其妙儻亦干慮之失乎蓋其矯偏于陳氏而不敢輕用朮香丁香桂附等熱劑似乎因噎而廢食懲羹而吹鑿其取長于錢氏而必用芩連牛旁連翹

之類以監制參芪歸朮等補劑似乎任將而中制
用兵而外監也其失亦起於泥內經瘡瘍屬心火
之言而未透其理也不知痘瘡雖屬心火却與諸
瘡不同諸瘡之毒當其初發而未成形可用藥解
散內消而愈及其已形而未成膿又可用藥逐散
未成膿而愈痘毒發自五臟必藉血氣送出于皮
膚運化之而成膿收結之而成痂而後收全功也
可內消而愈乎可未成膿而愈乎故諸瘡以解毒
爲主能解毒于早則輕不能解毒于早則重痘瘡
以血氣爲主血氣能送毒以灌膿結痂則生血氣

不能送毒以灌膿結痂則死解毒之藥多損血氣
不顧血氣之虧損而急於解毒是猶不慮我兵之
羸弱而急於殺敵也故毒有不必解者又有不可
解者若小兒稟賦強壯胃氣好飲食如常者其血
氣自旺自能送毒氣以成功其痘自始至終多順
症此不必解毒者也若其稟賦毒弱脾胃又弱出
痘時飲食又少或瀉或渴或腹脹或手足冷或氣
短促或失聲痘或出不快或根窠不紅活或色白
而頂陷或當灌膿不灌膿或當結痂不結痂皆由
血氣不能送毒氣此不可解毒者也當速用溫補